

Olimpiada – in'absurdità finanziaria ed economica

In comité da burgaisas e burgais di na ad Olimpia 2026 en il Grischun

DA MARTIN CABALZAR

■ **Ier ha il comité da burgaisas e burgais encunter l'Olimpiada 2026 en il chantun Grischun preschentà ad ina conferenza da medias ses arguments per in na. Da la partida èn stads la schurnalista Barbara Wülser, la vicepresidente communal da San Vittore Aixa Andreetta, l'econom Max Lüscher-Marty ed il medi engiadinais Enrico Bisaz.** Avant mo trais onns haja il pievel grischun ditg cleramain na ad ina candidatura per Gieus olimpics en il Grischun, da repeter uss anc ina giada questa votaziun saja in sfurzim, manaja il comité.

Ni unic ni durabel

Barbara Wülser da Malans ha accentuà che gia la candidatura per 2022 saja stada «durabla» ed «unica», ussa saja tut probabel simplamain «anc pli durabel ed unic». «Han ils iniziants a lez temp ditg manzognas? U tge duai jau ussa crair, sa dumonda Wülser. L'«Agenda 2020» saja be ina glista da recumandaziuns e las cundiziuns tar il COI na sajan insumma betg sa midadas dapi l'ultima votaziun. Uschia surpiglia il Comité olimpic internaziunal anc adina nagins deficits e resalva il dretg da pudair midar contracts tenor agen giavisch. Il ristg restia tar la populaziun dal Grischun.

Ils promoturs scrivon: «Il chantun Grischun posseda en mintga disciplina centrala l'infrastructura da sport necessaria.» E la schurnalista Wülser constatescha: «Ma ussa duain tuttina stabiliments da sport vegnir bajegiads tenor il dossier da la candidatura. Ed ella sa dumonda tge surpraisas che spetgan anc nus.

Gieus olimpics e l'entusiassem irraziunal

L'econom ed expert da finanzas Max Lüscher-Marty accentuescha: «Persunas cun in regl da giugar èn persuadidas che la probabilitad da sperder na vala betg per els.» Ils promoturs da Gieus olimpics en il Grischun fetschian da princip il medem. Bunamain mintga politicher dal Grischun saja fixà sin quest project, in fenomen ch'ins enconuschia en la branscha da finanzas sut la noziun «entusiassem irraziunal». Caracteristicas da quest fenomen sajan la survalitaziun d'ina chaussa, il cumportament da mun-

tanera ed en spezial l'illusiuon d'avair tut sut controlla. Il dossier da candidatura per ils Gieus olimpics preschentia in budget gulivà da 1650 milliuns. Ina contribuziun da deficit dal chantun Grischun n'è betg previsa, questas «garanzias necessarias» duai – tenor ils iniziants – la confederaziun surpigliar. Per quel motiv vegn Lüscher a la conclusiun che la regenza grischuna n'haja ni la capacitat ni la pontadad da ristg per pudair purtar in'investiziun sco questa da l'Olimpiada. Il chantun na saja betg pront d'equalisar in eventual deficit. «Tgi chi n'è sco investur betg pront da

surpartar in deficit d'almain 10 per tschient duai desister da l'investiziun», di Lüscher. Er ord vista economica è Lüscher persuadi: «Tgi ch'investescha guarda da betg ristgar tut a medema moda, tge ch'ins numna diversificaziun.» E l'expert da finanzas cussegla al Grischun da plitost sa concentrar sin eveniments survesaivels sco il Campiunadi mundial da skis a S. Murezzan da quest onn.


L'economia regionala e las regions periferas na profiteschon betg

Aixa Andreetta, la vicepresidente communal da San Vittore, recloma che pu-

spè be intginas regions vegnian resguardadas en il nov project. Plinavant na sajan quests mega-projects sco l'Olimpiada nagin sustegn per las regions periferas. Per sustegnair lezzas saja necessari da metter l'accent sin la hotellaria existenta. Il turissem sur onn stagl be durant la stagiun auta è da rinforzar l'infrastructura existenta. Ils gieus olimpics na sajan nagin sustegn per quai. Per Andreetta èsi cler: «Nus stuain finir cun quest baterlim e cun quest sfarlattim d'energia e resursas per tals projects. Las resursas duain plitost vegnir investidas en projects che promovan la multifariadad dal chantun, ch'èn vairamain innovativs ed han in vast orizont.» L'Olimpiada saja suenter las perditas tar las votaziuns precedentas tut il pussaivel, dentant segir na innovativa.

Gea al sport d'enviern – na a l'Olimpiada

Sco represchentant da l'Engiadina e medi pensiunà ha er Enrico Bisaz avvertì da betg laschar cugliunar dals Gieus olimpics. Per l'ina ha el crititgà la commercialisaziun dal sport ed era suttastritgà ch'ils Gieus olimpics n'hajan nagin effect positiv sin il sport popular. Areguard l'Engiadina ha Bisaz crititgà en spezial l'insufficienta planisaziun dal traffic. «Sch'ins ha uschè blers daners a disposiziun e vul investir quests en il sport ed en il turissem, fissi almain bun da far quai cun mesiras che portan in resultat direct ed han ina consequenza durabla», ha menziunà il medi Bisaz. Per exempel pudessan vegnir sbassadas u schizunt abolidas las tariffas da las pendicularas per giuvenils sut 16 onns per uschia motivar ils uffants da puspè ir cun skis, ha manegià Bisaz.



Il messadi da la regenza grischuna e la decisiun dal cussegl grond a favur d'ina candidatura grischuna per ils Gieus olimpics na pon betg persuader il comité da burgaisas e burgais.

FOTO Y. BÜRKL